

**Umiarsuarni inuttat pillugit inatsisip Kalaallit Nunaanni atuutilersinneqarnissaannik peqqussutip Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut**

**Saqqummiussissut**

(Ineqarnermut Attaveqatigiinnermullu Naalackersuisoq)

**Siullermeerneqarnera**

Naalackersuisut sinnerlugit umiarsuarni inuttat pillugit inatsimmut allannguutissatut siunnersuut aalajangiiffigisassatut manna saqqummiunneqarpoq.

Siunnersuummi inatsisit atuuttut naleqqunnerusunngorlugit naapertuunnerusunngorlugillu nutarterneqarnissaat, siunnersuuteqarnermi siunertarineqarpoq.

Ukiuni kingullerni danskit imarsiornermut inatsisaanni arlalinnik allannguisoqartarsimavoq, Inatsisartullu tapersiinerisigut aamma Kalaallit Nunaanni umiarsuarni inuttanut inatsisinik naleqqunnerusunik, nutaalaaanerusunik minnerunngitsumillu naapertuunnerusunik peqalissaagut. Tamanna aamma politikikkut inuussutissarsiornermillu suliaqartunit sivisuumik ujartorneqartarsimavoq.

Umiarsuarni inuttat pillugit inatsisit maanna atuuttut 2001-imi aamma 2005-imi suliaapput.

Umiarsuarni inuttat pillugit inatsimmi IMO-mi – Nunani Tamalaani Imarsiornermi Suleqatigiiffimmi – FN-ip – Naalagaaffiit Peqatigiit – ataaniittumi malittarisassat annertuumik tunngavigineqarput.

Umiarsuarni inuttat pillugit inatsimmi umiarsuit naammattunik inuttaqartarnissaannik, aammalu aqumiut inuttallu umiarsuarmiittut pisariaqartunik piginnaaneqarnissaannik qulakkerinissaq siunertarineqarpoq.

Peqqussummi saqqummiunneqartumi, umiarsuarni inuttat pillugit inatsit ilaatigut ukunani nutarteriffigineqarput:

- Søfartsstyrelsip aamma Kalaallit Nunaanni ilinniartitaanerup akornanni akisussaaffinnik avitsiqatigiinneq.
- Kalaallit imarsiornermut ilinniartitaanerisa nunani tamalaani malitassanut naleqqunnissaannik qulakkeerineq.
- Atortut digitaliusut atorlugit attaveqatigiinneq, taamaalilluni uppersarsaatit elektroniskiusumik nassiunneqarsinnaalerlutik.
- Umiarsuarni igasut pillugit aalajangersakkat.
- Umiarsuarnik uuttuisarnernik nunani tamalaani piumasaqaatinut naapertuuttunngorlugit allanngueq.

- Kalaallit umiarsuaasa inuttalersorneqarnerini soraarummeernermit allagartanik nunanit allaneersunik, IMO-mit akuerisaasunik atuisinnaaneq – tamanna kalaallit sulinissamut akuersissuteqartarnermit maleruagassiaannut sunniuteqassanngilaq.
- Kalaallit imarsiortut danskisut imarsiortutulli imarsiormik inuussutissarsiornermit piginnaaneqarnermullu aammalu akuerineqarnermit uppersaatitut akiliisalissapput.
- Umiarsuarni ingerlatsinerup isumannaatsuunissaanut umiarsuutillit akisussaaffeqarnerat pillugu aalajangersakkat nutaat

Peqqussutip matuma akuerineqarneratigut ilaatigut siunissami kalaallit imarsiortut nunani tamalaani imarsiornissaat ajornannginnerulissaaq.

Taamatut oqaaseqarlunga Naalakkersuisut sinnerlugit immikkoortoq Inatsisartuni kajumittumik suliassanngorlugu tunniuppara.